

友

聲

集

有竹居存稿卷上

陽湖言啟方侯卿著 鴛湖王 相惜庵輯

春江詞

天際桃花水年年向海流東風吹客去相送幾登樓坐
惜江波晚參差碧葉浮誰封三百斛遠寄董糟邱

當閩闖篇二首

海口紹仙掌九衢冠蓋闐如潮灌巨壑跳盪鰕與鱸列
戟指東第戔戔高入天主人罷朝請騶從雲連蜷云昔
帥曠騎橫行青海邊功多賞無算動直千萬緡時復侈
鹵獲光液驚星躔繚垣亘數里鴉鵲飛不前鬪富及百

有竹居存稿

卷上

卉池館紛芊綿美姬宅分占面隔忘爭妍昨聞角觶語
環海當晏然戰士老何用差足供游畋路逢金吾子攜
具來開筵赫蹏字如粟跪謁皆豪賢口吐聳霄漢目懾
沈雷淵庸知賣舂者躡屨方言旋

詔發白獸尊雅壽百寮肅五鳳三狻猊鳴吠宛家畜異
香前殿焚都下變涼燠瓊林武庫間積若盤古腹倒海
量珠犀彩虹自天屬問此來何方龍雷駭神速羲軒所
不臣萬里入賓服繪爲職貢圖伊摯粹難讀生逢時運
昌橫目享多福百靈皆公侯寶藏敢私蓄本無珍奇名
互市卽金粟崢嶸王會篇詞匹古岳瀆旅葵洵僞書誰

爲腐儒告

代日出入行

遙夜思萬古萬古此遙夜大浪

平聲

山頭人倒行方喧白

日東飛海西瀉

利瑪竇言地球底有大浪山與中國正對

明月來翩翩宵奔

絕可憐堯時減一寸今又三千年自非燧人以前燭火

絕素珠何必懸中天燭龍信有神不與六龍匹北遁寒

門踞天額雙眸閃爍雞鳴開彼國安知有日月

大牆上蒿行

不周之山其高九千里何人觸額摧立關使長風出入
於其間片葉飄飄見海外魚龍沙石乘之奔騰東南天

惟有白日西飛吹不還女媧煉石戲黃土奇壽那及羲
黃前泚筆盤古墓未死俱神仙眼中贏取二百七十五
萬年太古何蒼蒼中古何煌煌作書鬼夜哭自怨生鴻
荒有如激電絕光景斂之云亭梁甫都渺茫或云鴻厓
一女子歌舞傾三皇今乘白雲游帝鄉姊事天姥弟畜
文康我知洪水未滅太華頂其時十日拂枝五星聚井
金鳴銀涌甘食美寢儀態久已盈萬方欲往從之證初
劫惜哉不解鞭笞蚘豹驂鸞鳳王母見漢武諱語瑤池
觴桃源田舍奴漆簡知幾行出關柱史流窮桑秦阮陰
火燔黃腸念此大拂鬱紛紛扣槃揣簫欺羣盲曷不攜

美酒登高堂飲而醉醉而狂歲月如馳此亦一時客拊
掌我揚眉君不見牆上蒿春隨百卉榮秋隨百卉萎一
春一秋自終古天亦不能爲之私北邙窆髮而崔嵬珠
簾玉枕尙不鬻都市何由表爾昔日之高貴欲求混沌
以前跡轆轤請竭昆明池晝夜雨環轉何者是夢君其
思莫嫌九州小姑與汗漫期蓬萊日清淺嬉笑多嬰兒
龍伯國人今亦非魁奇相逢但乞釣鼇具手掬虹霓成
釣絲

春暮吟

江城玉笛飛春寒芳草夜綠天南端韶華彈指逐流水

滿裏香風吹紫蘭少年行樂未應晚鳴箏不惜爲君彈
樓頭一曲東風喜簾幙重重自捲起當門烏柏嘶紫駟
經過臣里東家子十千買醉頽玉山當壚歌哭誰知己
醉呼明月凌滄洲海水可煮人間愁碧城落花昨已掃
彩雲飛下白玉樓明鏡朱顏豈長好當筵且脫千金裘
東風飲汝一杯酒莫遣桃花笑不休

關山月

馬首秦時月淒然似客心始知鄉夢斷不爲塞垣深處
處吹蘆管年年望藁砧秋來歸雁絕誰寄玉關音

當古長城歌

城上秦時月城下秦時骨請歌長城歌休悲築城卒築
城本自武靈起塹山湮谷遂至九千里銅人可碎城屹
然噫乎祖龍乃不死當年蒙恬才絕倫曾踰高關驅胡
塵監軍三載只堅守於此始見扶蘇仁三十萬衆捍中
國遂呼中國爲秦人見大宛傳武皇開邊何足道蚩尤旗出
禍難料學仙雖誕心神清能決輪臺罷兵詔後來誰關
獅子王雄心誓欲吞龍荒毒河鹽磧斧亂畫都護總管
徒披猖血流青海海波沸鬼兵再戰天無光寥寥殘壘
夜吹角但望玉門如故鄉帝遣角觶作人語惜其不早
生漢唐烏虜漢唐之亡讖豈在西北寇來幸有長城塞

長城以外去安極張裴妄語良可誅

張騫裴矩

無限征人淚

橫臆

日苦短

日苦短夜有餘擣蒲六博爲君娛奉君蒲萄之美酒繞
以甲煎沈水之薰爐華燈四照銷氈氍妖姬對襲純白
狐裘聲一曲明月徂百萬君可擲十千君可沽問君胡
爲色不愉此時氣燠如春初但恐雪花今歲無六龍之
飛不可以力挽百年迴轉纔須臾烏虬且安寢善保千
金軀

越姬歎

鬼能歌妾能語望侯門泪如雨侯門良不誣樂事天上
無燕山寒夜雪片麤唐花百斛鋪玉除貂裘皴體仍輕
裾蠟煙損目懸明珠此時萬戶斂魚鑰主人罷直妾行
酌可憐狎客爭輦金耳語連宵款東閣漏聲不絕酒尙
溫傳呼緹騎前到門新翻一曲未經試餘事悠悠安可
論

浩歌

今我不樂思浩歌丹砂爲撫青海波海西萬里山嵯峨
碧城十二岷嶰阿樓居玉女笑齒瑤仙衣輕細非綃羅
咽服靈液鬢不皤天宮博戲償青蛾但令歲輸千斛螺
有竹居存稿

彩雲東捲來銀河時從阿母宵經過俯視下界眞么麼
肥蠟光爆如飛梭地球敲仄邱壘多曷不辟穀游天和
上清寶笈無殊科偷桃三度羣仙呵臣朔苦飢當奈何
將進酒

將進酒先作歌有口不飲當奈何橫空一黃鵠獵獵從
風過焦僥叩龍伯青天高幾多青天之高或云九萬里
燦闕璘璘耀蒙汜往時誅蕩開咄詫徧都市蠅螋光閃
屍乃亦畏人指酒星上言臣有薄技請以一螺幻瀛海
咸黑溺兮塞聰離朱營兮短視自地以上都茫然九關
沈沈乃在大陰裏其視下也亦若是而已矣重兮黎兮

絕地之通從此起問伊何自排天闔前有庖媯後有結
璘幸不爲西王母年衰戴勝而矐首然後可以爾月窟
礎風輪有何蹇老公謬稱下土蟣蝨臣不願神仙願流
電光周八垠喜不必賜強趙醉不必封狂秦虎豹旁睨
羣龍嗔何以贈之倉琅根倉琅根兮繫金紐市兒匿笑
齊拍手我獨哀其精已銷清狂不啜醪與糟就令呵壁
瞰神鬼憤激猶離騷天問天對方遙遙悲風蕩野火大
澤聲枯焦蛇虺久噬螫值此將安逃駕雲車酌斗杓大
言欺世非人豪高陽酈生益無取徒取牛鼎相煎熬君
但勝梧勺爲君歌且謠歌且謠不終曲憂杞人之憂豈

必勝流俗君不見青天萬里一黃鵠

當丁督護歌二首

丁督護來何暮欲招都護魂
插箭向何處督護來前且
復一言城中浴鐵凡幾千
寇來一矢噤不發倏化蟲沙
殊可憐

丁督護宜急去不去口噤噤
此行得無誤圖山高海門
遙鼓統統焚麗譙督護督護
爾胡憊不知其故九壇設
祭天茫然髡首緇衣遍行路

臨江王節士歌

木葉落秋士悲望蒼霞露未晞
飲江水馬不肥撫長劍

徒褰衣月向海西下雲從河朔飛天風吹白波萬籟噓
噓噓草間狐兔來狃狃神鷹搏擊今其時我欲哀歌誰
和之燕趙隔千里安得高漸離

海客行

君不見燕齊海上談神仙怪民已起秦漢前珠宮貝闕
在水下曾城懸圃凌山巔蟠桃結子熟難待至今未屆
三千年神仙一變爲市闌估胡尤盛隋唐間波斯衣飾
括龍藏天方衢路鋪金錢不知何物賴中國紛紛歲泊
番禺船市闌再變爲戈鋌夷孽乃自前明延滿刺橫將
澳門堵荷蘭徑向澎湖遷鄭和尹慶互繫空卒由蘭黨

滋兵端

荷蘭據臺灣由稅使高宗取賂敗之

自東而南迄西北層冰夜裂

陰火燔未知三變更奚似阿壁欲問蒼浪天地球廓廓

九萬里冀州上應明堂躔沐日浴月寶光聚冠裳玉佩

何雍然一莖一葉盡靈藥窮荒安得無垂涎能將碧海

化弱水次或清淺成桑田不然分鑿金翅鳥啄取巨舶

飢腸填游魂飛彪絕往返然後吾民淳閻如羲軒海客

一義來翩翩今猶可耳無多言前二劫中亦如此君其

偕我游毗鄰

春陰

亂雲如夢春無影一樹桃花闕露井何處清簫向曉吹

花陰獨立衣裳冷，祗愁風雨攪芳菲。
寂寞閑庭晝掩扉，燕子不來寒食近。
江南江北鶉鴝飛。

釣臺和韻

垂釣桐廬去，悲歌汐社來。
乾坤兩狂客，今古一荒臺。
隱得梅仙訣，騷傳屈子哀。
江山標越絕，何假霸王才。

書史氏致身錄後

淮西僧寺潛龍藏，文孫魚服仍黔陽。
眼看白帽送燕邸，宮中披薙紛從亡。
雲門雪庵補鍋老，烏朝屢集哀牢疆。
西登峨眉東雁宕，績溪奇士擔行囊。
翠華玉漏入夢寐，涌憾翻愁歌慨慷。
吁嗟此變古所闕，鼈靈杜宇都渺茫。

朝臣知有故君在鼎鑊慘戮神揚揚頗恨滇南地萬里

沐家世鎮兵最强榆木川頭斃胡矢樂安監子旋跳梁

一龍五蛇欸然起可通金齒兼白狼子頽子帶魄先餒

北都安得矜鞭長爾時香火緣竟絕陸法和語無乃天心終

讓王堞風齒露四十載徒稱老佛歸故鄉吳江賓輔惜

早逝史宏尙渡蓮花洋楹書密記縱小異斧聲燭影干

秋彰奈何蒙叟獨輕詆實錄但據明文星火焚禮葬事

容有祗取后尸加袞裳降臣執筆語多妄叩頭乞命誣

忠良成祖實錄云方諱書遜國詎足辨不聞永樂時周

防朝遣胡濙訪仙跡夕勅鄭和搜海航卦占歸妹倖脫

耳賴有稗史今能詳我思勝國幾遺老蒙叟晚年眞耄
荒拜迎馬首意自得直謂人地同三楊世間節義盡冰
炭指爲烏有庸何傷列朝請傳借彪史便騁私臆分低
昂絳雲一炬實天譴不然萬口騰離黃竹垞石園復何
意沿流吹沫波益狂要之此冊不可毀井中鐵匣同光
芒二十二人死不朽排雲從帝游天闌

柬戎仲良

憶昨君呼雙畫橈牽衣遲我游金焦碧雲東去捲秋色
海水一片天衣飄回看北固動晴旭舉酒遙酬米海岳
玉笛聲中宿廣陵揚帆直指棲霞麓風吹積翠來高峰

奮飛絕頂攀秦松嵐光倒影蕩空際欲折天上金芙蓉
過江更蠟五兩屐夜蹋危磯欲崩石南朝名勝落眼前
飛心已作秦淮客秦淮十里琅玕流石城艇子迎莫愁
月明忽弄紫簫曲梅花夜落吳姬樓朝來繫馬白門柳
長干女兒工壓酒當壚戲拗珊瑚鞭質取千觴亦何有
半酣便走雨花臺綠煙滿山吹不開雙鬟秀出夾明鏡
似笑客從吳下來輾然回首望江路采蓮唱罷紅衣暮
襄陽大估下揚州附書便問西津渡別來再見秋月圓
京江風物劇可憐會借仙人兩黃鶴攜琴飛過三山巔

北固二首

金焦鼎峙海雲橫山勢西迴鐵甕城六代風煙鎔石壁
五州鎖鑰枕江聲樓船夜嘯南徐市畫角秋嚴北府兵
遙望佛狸祠下路神鴉社鼓舊連營

江介西風日夜聞城頭木葉暮紛紛楚天蕭瑟秋無際
吳渚微茫望不分潮落黿鼉沈海氣霜清鷹隼下蠻雲
蒼然暝色淮東滿獨倚危欄到夕曛

曹將軍墓行

有序

將軍地志佚其名明成化中睦學士紘祠記云
唐之季有訛言青城叛者會大帥與將軍鄒使
引兵屠城將軍詞其誣沈甲井中而自剄井南

寅祠壁屢壞巫曰神欲闕井也闕牖乃已墓又
在祠南嘉慶初家君購舊碑不獲迺立片碣焉
將軍之塚疑塚耳我疑將軍已不死千年於此專城居
更數千年會如此當時大帥何紛紛蜚書一紙屠萬人
萬人勢若一敵國借一敵國傾將軍將軍能料大帥怒
不料蜚書驀無據屠城令限三日間不屠且危屠更誤
怪鴟如拆城頭鳴將軍曰嘻此何聲逆巢插翅飛不到
吾城安得爲賊城流星如帛城中驚將軍曰嘻此何形
逆巢磨牙咋不止吾兵安忍爲賊兵慨然一死萬人雪
白衣巷祭眼流血下窺沈甲井水赤覆井何人徒磐石

巫言旦日將軍來神光遶井旋風雷但看石上產孤柏
朱牖合向祠陰開祠陰望井南望塚塚今不與城俱頽
就令塚亦化平地傍海猶將吐雲氣海雲布陣天際橫
自有將軍下天際烏虜將軍闕名名卻傳將軍不見唐
初年九嶼山前賜葬一百六十五牘石殘碑十六眠荒
煙

初秋偶成

山小夢亦幽涼意起我早夜來微雨過門外生秋草欲
往前谿行苔徑無人掃

述古

秦以水德王掌火乃其祖餘烈燔百家燿若赤燦怒慨
從周之衰橫議塞區宇紛紛皆怪民奪纛穀強弩倘不
生祖龍造物亦殊懦叶七十二代終橫開小盤古掃蕩
如洪荒應運莫能阻阮儒數百人學本異鄒魯聚訟溫
谷中其詞已首鼠咄哉奇章公五厄輒先數未聞岩壁
間廷尉令搜取聖經猶日星誖淫竟灰土假手良有由
所惜太豪舉功隱而罪彰一炬付西楚

徙河匈奴中可以制狂孽長城亘其南尾自趨勃碣亭
戍旣立除宣房與俱撤我讀延年書遶牀叫奇絕武皇
才最雄奈何不蒯決得無衛霍流按圖氣哽噎兵行歲

益封翻恐北庭滅萬古爭一時時過力難掣於今形勢
殊安敢祖前說坐視中原民累世化魚鼈賈疏盈千言
紙上偶饒舌上策旣不行補苴蹈前轍水工亦何知寶
此比丹訣金隄高入天潰者始蟻穴蟻穴如可防君其
鑄頑鐵

過黃鵠山

落葉聲不已忽來黃鵠山山寒絕行跡時見白雲還仿
彿鼓琴意尙留松石間無由覓通隱投宿款柴關

舟夜有寄

愁水愁風夜何堪月倍明欲尋孤驛夢已隔半帆程沙

淨涵星彩林幽幻雨聲不應緱氏鶴無意伴吹笙

宿孟瀆江口偶成二首

孟瀆貫江口開流始元和重逢兩行省

元懽察台明周忱

宛續

池陽歌浙餉昔綰轂赴淮由白河萬艘一朝改溜淺難

經過

明以瀆爲浙漕間道由江北白塔河赴淮國初回空係向從此入船制止四百石乾隆四年漕督補

熙始請改

往閩海氛惡衝要當橫戈閉戶關旁竇形如

十丈大船

江有沱

明季築備倭城於瀆西會堵正流而由支流

圖經混支幹歷久翻沿

訛自此日淹阻漲沙成陂陀塞喉使鼻飲不噓當奈何

自慕公天顏誤以支流爲

正流水道紆曲江口日淤

雲帆轉遼海粳稻來東吳

杜句

語足補唐史少陵當不誣

微茫福洋路五季猶爭趨

閩世家貢道胡三省謂起自福洋

遂開伯顏

策百萬相委輸清瑄拔盜藪腰佩金虎符遮洋逮明季
宗沐徒區區龍雷倏交閔巨艦漂鳧雛棋布百千島齎
糧滋可虞先事若左券徵之邱與于邱濬何人好奇計
避坦甘崎嶇小利思遠賈小勝思長驅罪言感杜牧夜
起披輿圖北溟鬱煙霧飛夢淩紫衢夢醒志吾過憂天
無乃愚

瓜洲

昭關迴首祇煙嵐小飲蓬窗酒易酣一色晴波三十里
昨宵明月是江南

清江

閑買清江一葉舟坐看三十六陂秋多情誰似長淮水
遠送黃河入海流

東阿項王墓

不殺沛公不都關中不渡江東三以天下讓大王眞重
瞳奈何王身分五體王頭走千里虞兮虞兮馬前死藁
葬濠州長已矣我從彭城來狂嘯戲馬臺東阿拜王墓
願王心弗哀不見生當烹死當醢功狗誰骨安在牧羊
兒入秦陵空牧牛兒入漢陵毀羣雄俱化黃埃飛何論
桑田變滄海穀城古碣經千霜不書魯公書楚王王之

始封如故鄉西走鉅鹿南馳芒碭一抔亦具拔山勢下
視四山風起雲飛揚

過涿州

晨登督亢坡驚沙四達勃盲風擊面狂中挾蚩尤骨莽
莽古范陽遙睇蔽林樾連山太行來拔見氣笑兀雲際
車輪盤高城下霜鵲摩肩州北門馳道亘如髮當年出
蕭關列郡布戎卒桃淶經變遷時露飲馬窟英雄用武
地環顧尙恍惚元封訖天寶兵力此俱竭乘權魁柄張
失馭天步蹶橫界拒馬河獨鹿表斷碣交流得桑乾兩
隄互出沒僕夫云已疲待渡意飛越漁商舟次喧煙火

有竹居存稿

卷上

十四

市頭歌笑作猛虎吟揭衣踢寒月

有竹居存稿卷上終

有竹居存稿卷中

陽湖言啟方僕卿著 駕湖王 相惜庵輯

過宋宮人葬地

金臺石道連通潞馬首風沙日將暮片碣苔斑字半淹
依稀故宋宮人墓停車憑弔益悽然令我重思德祐年
降表僉名先謝后乞骸遙葬越山邊皋亭官舫牙旗簇
貴主昭儀同一哭雙雙入道著黃繩舍利焚來珠滿斛
就中激烈數賢妃第二筵開已豎眉直寫麗娥懷刃意
館間畢命付朱絲

朱氏陳氏事
見西湖志餘

其餘流落都無狀有詔

偏教歸北匠只似邯鄲舊內人生隨廝養甘同壙揮手

有竹居存稿

卷中

一

俱辭帝子家更愁飛絮泊天涯不知青塚留何處得死
翻應羨麗華亦有玉顏仍被選十年靜鎖宜春苑風吹
起輦谷中雲目送官車長不返可恨中都復上都君王
游獵歲留圖琵琶十五彈朱雁怯薛三千曳白狐龍首
黃扉門下直鷗波玉牒帳前趨何如供奉長鬚客拂襲
攜琴便入吳吳越茫茫天水碧錢唐江作明河隔曾凭
春晝戲鴛鴦那料秋風驚蟋蟀萬騎銀袍叩禁門數聲
蘆管離荒驛甌屋椒盤耐苦辛畫闌桂樹縈魂魄妾身
拚擲玉鉤斜祇恐傷心到行客行客傷心可奈何幾抔
黃土已銷磨早無螞蟻墳堪認詎比蝦蟆陵下過海島

空聞沈寶壘和林旋見泣銅駝千秋惡夢憑誰懣應乞

西方老木波

瀛國公爲僧號木波和尚

君不見雪窖冰天迷磧路燈

檠松段都難據爾時妃主盡嬋娟愴絕中宮腸斷句

欽宗

朱后有絕命詞

又不見息婦堆前石穴開月支飲器落塵埃

指理

宗頭骨事

蘭亭玉匣珠邱土賦罷冬青風雨哀

自都之固安渡永定河作

桑乾之水如游龍蜿蜒千里趨海東龍祠一扼勢尤怒

龍祠浮梁見許亢宗奉使行程錄卽今蘆溝橋

怒若大魚中連弩歛南歛北無

兩涯走石移沙挾風雨上游已縱長城開下掃應驅太

行堵桃花夜落桑葉飛塵劫茫茫失今古憶昔入都水

方阻方城城北候津鼓車箱湫隘耳欲聾後侶乘高望
前侶黃雲四塞風怒號隔河突兀西山高皂雕橫天送
落日萬馬蹴地愁崩濤濤頭直下幾千尺牽舟徑截老
蛟脊往往膠舟把舟磔昆侖泗水衣渾脫平聲額觚肩摩
臂交戟掀公出淖仍負公抵岸登車失左舄背河百步
聲雷殫餘怒猶能奪人魄可憐歲月如流梭出都不覺
秋霜多契丹車渡法堪試車渡桑乾見張舜民使遼錄但見爲壑爲
陂陀河隄使者夜寘酒高齋劇笑朱顏酡臨朔荒宮久
蕪沒高梁斷碣空摩挲披圖漫指督亢坡何人燕市逢
荊軻并州卻視僅百里闔仙涉此曾悲歌逾河作客亦

非計且喜歸夢無風波烏庠歸夢且喜無風波南有長
江天塹連黃河

銅雀研歌

研爲韓城張尚書延禧手
製以貽宋牧仲先生者

論詩如論黃初前此研可與相周旋漢宮斜月影曾照
瀉淚豈獨金銅仙阿瞞文采亦人傑數行遺令平原憐
水井香姜一彈指何況銅雀堙荒煙琉璃筆斷石墨解
彼皆玉碎非瓦全瓦今縱可煉爲石力難補此無情天
建安七子爾能識遂結終古詞人緣綿津尙書愛尤劇
百字銘背何聯娟胡桃油帶錫花點已軼灌廟追甘泉
郵傳數主作佳話寶用那羨宜城輒噫昔袁曹戰河北

鄴西夜決鳴雷淵澄泥漬地雜膏液歐譜尙冠諸州巔

歐陽公研譜謂相州澄泥優于石

况多古墓著皇覽秘藏遠在先秦先

玉脂鬼血互疑結白壤暈作芙蓉鮮發邱郎將摸金尉

陶家之側方窮穿盜若長陵一抔土清漳攪漉彌精堅

其間星野插東壁金氣下爍光瑩然釀成奇質信非偶

雖小亦恐蛟龍纏兵劫頻遭武安震文游竟賴韓城傳

對酒當歌倘相試還須老將來幽燕五官公宴豪舉耳

慷慨且賦三臺篇吁嗟乎西陵疑塚犂爲田西陂秋水

流濺濺詩壇盟主各雄長英名如並葵邱懸

水經注引春秋古地

記葵邱今鄴中三臺是也

研乎願爾享奇壽從此更閱人間一千六

百一十有六年

自道光丙戌上推建安庚寅正得此數

大風過沙隴

不信風沙苦風沙到眼前炎天霰雪窖白日夢雷淵影
急雙雕落聲枯匹馬旋長驅踰萬里何敢薄燕然

不飲

不飲依然醉難爲塞客吟蟹胥償宦味鸚母怪鄉音城
小荒苔積山寒碎葉深白雲南望遠何處更疎砧

雪後聞西師累捷偕費畊亭飲市樓乘月而歸倒

用昌黎石鼓歌韻

白日出矣無蹉跎驅車碾雪循玉河朱樓四望酌君酒

有竹居存稿

卷中

四

遠勝燕市邀荆軻昨聞西師已報捷夕馳露布來朝那
此時塞外白草折高飛皂雕呼鵞鷺關西老將可游獵
習唱敕勒先長哦史岑碑下小隊簇古苔手剔三摩挲
射生縱飲且爲樂番女卸鞍容嬋嬰陰山西走界萬里
銷鋒灌燧知無佗指揮四郡五屬國禁中自有牧與頗
洪河流漸瀚海凍但從冰下聽馳波賈胡互市列寶玩
玉誇新琢犀新瑳行看振旅入張掖萬人鼓吹關頭過
軍裝鹵獲亘山積郎當鈴鐸聯明駝屯田使者復四出
史稱涼州畜牧多遣官寘吏議開墾流移初募停催科
交衢絡繹地氣盛頓令絕域回陽和分疏蒲類引鹽澤

如漢有潛江有沱錦車馮嫪賜持節巡行夾侍雙青娥
黃羊桐酒雜酥酪期門高宴俱委蛇圍場部勒試骹鏑
曠騎織路同飛校遠夷慕化百宿到勝關甌越通牂柯
獻俘

廟社奏大愷風吹鼙鼓驚鳴鼉

詔書伐石紀功德曰臣籀法兼蠡螭監儒生幸逢

聖世欲表大事防舛訛金吾放夜月輪早歸路不愁醉
尉呵憑闌縱目爵無算遙聞楚客吟陽阿太行入陁此
其尾雪光射而尤嵯峨斗杓東指列星朗下罩八紘歸
網羅亘空絳氣屬燈市金支翠旗中邊磨豐年之瑞舉

觴祝願今寰海無兵戈堯民擊壤偏畿甸嘯咏我亦偕
羊何奪關入蔡未足道請廣常武宣王歌

渡汶水

魯酒依然醉難爲竟夕留古來無別恨此水不西流皎
月偏催曉枯桑易感秋隔河時往返羨爾一輕舟

陳沅小像

同時呂
梅墅寫

彩霞一朵從天落夢裏昆明煙水綠幻影重逢洛浦神
驚心別唱吳趨曲梧宮新語記分明小傳雕鏤付鈕生
果否黃巾偏解事不緣青瑣始知名長齋繡佛眞無那
似海侯門春易暮哭到包胥色色空

吳三桂死
沅乃奉佛歌來李

鎗聲聲破何意金闕老畫師傾城追取少年時一錢早

索夷光笑八面翻嫌大士嬾

三桂妾有八面觀音見劉健庭聞錄

我昨披

圖三太息明妃村畔曾題壁池留壁月待情人

沅武進奔牛人

地有星月池

江隔金沙非故國故國微茫話劫灰田妃遺挂

問誰開酒闌家令朱顏改琴罷昭儀白髮催從此將軍

思睥睨錦車那畏卬蘭閑夕次摩訶咏夏涼朝沿穹甸

陪秋祭梁州過眼幾亡王阿蘊風流阿段狂連臂定呼

番女蹋龍頭還帶沐家妝騶虞褥暖瑤屏皎黔國園亭

供卻埽祇恨犀珠買賦難

三桂客以重幣乞梅村改製圓圓曲不納

輸他綾

被題詩好當時倘憶永和門遣嫁由來是主恩石砧鵲

魂悲女帥朱波魚服感王孫便應泣向平西語多恐君

王徒自苦嫵媚終慙孫仲謀聲雌更謂桓宣武官今勝

作執金吾

音

薄命安能學麗華羨殺官娥先刺虎忍聞

貴主尙隨鴉

思陵女順治中仍嫁明助臣子

若論大耻何年雪縞素當

關原慟絕劉昶雖饒愛妾心王琳宜表孤臣節不然盡

室赴遼東投老仍邀戚里封

三桂子應熊尙主

繖付諸蠻祠洗

氏釵因何杜餉周公妖星底事纏天市鏡破菱花瓶缺

耳

見演載記

玉几金牀只暫眠珠歌翠舞都忘死惟餘晚節

使人憐脫屣能知籍沒年斜抱琵琶羞去伎淩虛環珮

想飛仙只今荒徼桑田改銅壁關西殘魄餒

三桂眞骨瘞關外

秋壑藏書燼欲寒昭靈寢殿蕪堪采

三桂有萬卷樓又叛後卽起永曆母

陵匆匆刀劍雨修羅泥偶應遭佛祖呵

三桂塑像報國寺想見

優婆持戒意爲伊兵劫懺除多依然淚洗桃花面尺五

鮫綃售百絹魂斷難尋洱海招鰲深宛向茅津見

三桂逐賊

渡河始獲沉

綺窗小立玩蘭茗自著黃絕態轉嬌休怪尹姬

甘屈體

沈虬圓圓瑣記云在滇時稱那太太從母姓也

早隨楚俗鬪纖腰劇憐

金粉餘波遠幾許丹青傳委婉紈扇嬌紅血漬新

李香蠶

賤露葉啼痕滿費南部煙花總勝游眉樓人比絳雲樓

柳顧二像俱藏孫淵如先生處

卷中玉貌如相識何日同銷萬古愁

觀臺灣班師四首

露布蠻荒入饒歌日夕聞射蛟腥海霧浴馬沸江雲絡繹平淮表輝煌諭蜀文傭書眞寂寂羨爾水犀軍

當代王元輔家徒悉將材高牙妖鳥集露髻老罷來幾

載辭樞府崇朝翦盜魁臨淮呵護遠重睹駁雲開聞提督王

公得祿家居辦賊公出李忠毅公麾下曾殲蔡匪於黑水洋

昔走長安道西師正凱歌獵曾穿月竊洗欲挽天河曠

騎今彌整穹碑歲輒磨側聞銅柱界笳鼓再經過嶺南平

檄到供張具人知健令能朝纔千帳卷暮更百牢徵白

羽麾胥口黃頭織廣陵劇憐磬鼓急萬鈔正椎冰時方浚河

李申耆先生貽所模

內府輿圖縮本

地球結體如彈丸罡風掣向空中懸一從帝倍之世波
滔天浸淫踰百五十有八年

本泰西氏書

沖沙刷土不以人

力與自此地形凹凸刻露非渾圓堯時水退十日爆裂
紋龜坼蛇蜿蜒神禹道之分百川爾時崐崙碎石隨流
而下莽無數往往散列徼外兼中原命名山岳及陵阜
高高下下到眼都茫然循蜚古紀有何好談其地體天
體同覆盤既無衡管測亦無積矩攢大圓一覽得彷彿
布算早已推軒轅九區圖籍一碁局便畫方郵應無難
惜哉裴秀謝莊賈耽杜佑生也晚各矜絕學誰流傳元

和郡縣有吉甫四至八到窮中邊差之毫釐謬千里方
隅遠近何由箋譬如醯雞處甕議廣廈安能準量楹與
椽抑又安能規而睇之尋尺間帝哀萬古入長夜篤生
聖祖開天關寶書玉簡百靈獻奄受重譯通諸蠻直從
須彌山麓登其巔日月出入猶轉環北勒寒門西祀虞
淵東南跨大海自古不奉正朔不受冠帶之主皆來前
月中地影計已得大半倘無職方王會篇史筆何由成
巨觀遂援斗極立表檠一經一緯依星躔大荒內外無
不到卅載始覩輶車旋

康熙五十七年諭皇輿全覽圖費三十餘年心力始告成

寫爲大圖縱廣各五丈餘分百二十幅隨方編

詔云法本郭守敬恢張天網吾能全以天度地秒忽具
雖有狸步歸蹠筌高山絕壑劃鳥道平鋪鏡面紛鉤連
此真三代所未有秦皇所藏漢武所按何庸言乾隆之
中仍改刊王母益地惟西藩武英銅版彙十冊秘笈始
命儒臣頒惜乎寒素乏阿堵借觀厓畧難精專頗似荒
岩鵲冠侶欲探元象無璣璇申耆先生今馬班早游東
觀窺善卷指南記里存真詮津逮後學心拳拳偶試長
房縮地訣模稰實行篋尤稱便昨宵寄我我未讀同學燭
照羣爭先客齋晨起挂素壁開方細別勾股弦思本舊
圖果兒戲阜昌僞刻彌狂顛有此豈復持兩端顧聞胡

黃腹萬卷

亭林百詩
淵明子鵠

泛論形勢當從刪惟有徐霞客徒

步尋江源覈以太西術道里殊無愆先生去取洵不偏
實事求是覘一班箭籌滿握珠徑寸吾乃今而知渾儀
土圭刻漏之法無他焉

互市三首

互市何年海外通往還祇借一帆風願移弱水三千里
直遶遼東到粵東

土價同金事有無少年偏羨列仙臚名山根葉憑伊采

爭換冰天押不蘆

大西洋諸國俱需
中國大黃茶葉

爆竹聲從太古前兵家在注火攻篇君看一卷商高語

不落西荒妙不傳

西洋礲法亦以勾股測算

答盛午舟

海鶴銜素書乘風向吳會飄然落我松牖間上有流雲
若飛蓋一書未報一書催櫻桃花下參差開昨復有書
附雙鯉呼童烹鯉心徘徊長飆萬里扇大壑曉蹋龍鼉
纜鼇腳海童捧研龍女歌夢君對飲蓬萊閣天門呀豁
凌鴻濛夜半風雨撐秦松火珠驟擲百寶碎思君振衣
日觀峰俄聞金絲壁中起古彝漢碣綰蛇牙叔孫綿叢
徐生容羨君講射古闕里丈夫得志須及時南臺光祿
多威儀身導板輿歲馳驛優游殊勝皇華詩書來笑我

佳興敗中歲應須了詩債爲余洒掃太白樓此言雖戲
頗稱快君不先招我亦游坐看江上芙蓉秋水騎赤鯉
陸黃鶴免質當年紫騎裘

來書計及
資斧故云

五人墓

市井能將義俠傳婁東史筆豔當年生啗張儉貪亡命
死笑要離耐獨眠馬骨屢售金五百

時方募修魚腸足掩劍

三千祇憐北寺諸君子碧血依然狴戶填

閩門舟次送余丈冰懷之廣州

昨夕之月今夕來昨日之花今日開未知明日定何許
那不一笑傾千盃不然天付此花此月此酒胡爲哉金

闌亭前煙水白大鰲卧波百餘尺江魚骨美湖魚肥吳
孃斫鱠雪山積君昨作主人君今作行客南北悠悠話
疇昔未須擊筑彈哀絲酹酒銀河意超忽月亦曾照吳
王游花亦曾對吳姬羞五湖一舸鴟夷浮當年風景能
無愁問之花月了不憶至今水調惟唱吳宮秋吾生織
路等胡估歲泊吳門賦懷古旣不傍要離墓復不賃伯
通廡沈醉東風又奚取廣州花月天下奇恨不遂從君
萬里黃鵠舉

獅子林

花間石磴蹋花上石下俄聞人語響迴身左折窺石門

右復一穴明朝瞰穴中漸暗路偏迴語聲歷歷轉人頂
天光導我屈曲穿頃之殊訝聲寂然玲瓏石竅屢旁軼
倏又語聲壁中出時露半裏時半鬟並趨咫尺旋隔山
山坳亭子試趺坐坐見隔山水環鎖水聲鳥聲交語聲
引我再作偃僂行距門大石駭無路迎面何人側身度
循行數轉疑漸高水花濺穴方蕩搖穴間仰視深爾許
俯聽依然有人語語猶未了聲輒騰空穴答響知幾層
稍東磴道透山口石扉裂處誤西走千凹百凸一穴斜
樹根絡石何槎牙樹身徧覓不可得隔山鬟裏瞥相值
聲聲蠻語誰叫呼乃是水鳥鳴山隅攝衣出穴鳥聲避

恰喜聲從竹爐沸水亭啜茗花交飛遙看老樹身合圍
須臾片裏隱石穴小鬟稱妮出復沒風吹笑語聲裊空
此必擠跪汙泥中山無十畝水一畝使人目眩更良久
倪迂狡獪真絕倫不覺狂笑驚游人獨游明日定何處
便買輕舟石林去石林響石如可尋別是天然山水音

廣武君廟

在邳之黃石山相傳君爲雹神廟卽其故居也後有黃石公祠

烏呼神龍見首不見尾神鷹一擊卽千里卓哉廣武君
國士蓋無比淮陰旣不從吾言安有仍居下邳理君其
或者感知己千秋魂魄猶應戀此耳將軍所短君所長
至今紙上聲琅琅蒯生倏入酈生死移兵東下紛披猖

區區之計只願爲假王幄中一躡足反縛終受殃君乎
安忍坐視良弓藏吾聞安期生挾策干項羽片言不合
遂遐舉君之悲憤當更深何怪起雷造冰氣難阻嗚呼
風雲感會多英雄西向師事何倥偬生平不屑噲等伍
失計乃與成安同君不見橋邊孺子定可教兵家爭拜
黃石公

楊雲萊自江陵以書述楚游之概賦此答之

水有洞庭彭蠡之狂瀾山有匡廬巫峽之層巒邈然楚
塞幾千里美人含睇南雲端閑聽郢客弄白雪渚宮六
月雄風寒有書昨附雙飛翰報之愧乏青琅玕書來南

楚我西楚是夕彭門響秋雨小山叢桂風蕭蕭雜沓騷
心鬱終古河防江防語連鎖手無斧柯奈何許狂詞喧
闐徒驚天天乎得不困之以羈旅君不見琵琶亭權使
風流今杳冥黃童於此傳餘馨

唐權使俊公嘗設紙墨
亭中待能詩者黃謂黃

仲則劇憐蝦蟆陵下老商女銀篦玉撥彈飄零君不見滕

王閣開府聲華漸落冥彭郎曾此促行酌

宋開府牧仲
重修此閣彭

羨門詩

歷卷劇憐蛺蝶圖中舊主人繡闥珠簾捲寥廓又不

見黃鶴樓尙書碑版猶炳彪汪生得此誇壯游

汪容甫
代畢尙

書秋帆

製樓銘劇憐鸚鵡洲邊一抔土蘭煙桃浪沈寒湫對此

茫茫屢搔首天涯知己勞奔走撫劒長歌行路難安知

有竹居存稿

卷中

三

身世當誰偶片言我欲爲君吟且飲巴陵百船酒况復
西游七澤西騷人湯沐皆君有乘高顧盼江漢間湘東
荆南骨俱朽遂作憑陵千古人胸吞雲夢可八九慎莫
煎心嘆轉蓬九歌九辨悲回風鯽魚飯飯此間樂吾方
遙羨韓朝宗君不見青蓮高揖二千石一朝吐氣如長
虹

重題兩當軒集後寄黃藝屏

涪翁昔憇歌羅驛口授竹枝逢太白蠻花落盡嘯春鵲
萬古天爲兩人惜詩孫小印傳者誰

桂未谷以山谷詩
孫小銅章贈黃仲

則人道酒星又遭謫同州七子才最奇長揖三吳二千

石鳳雛彩若垂天雲展翅先愁九州窄問誰與汝逍遙
遊海上難邀釣鼈客平生所至歌且謠知奪西江幾人
席憶我曾馳東海頭洪濤怒捲千山秋風檣劈浪疾於
馬遂泊采石之飛樓青山魂魄不可作誦君狂句無人
酬戲書片葉擲江水江底蛟鼉俱伏流自此以西渺千
里衡廬七澤方鬱適美人香草備湯沐我所未歷君皆
游有如遠竄夜郎客當筵氣必凌王侯綺裘醉舞樂復
榮忽騎胡馬思燕幽四明道士骨已朽金龜換酒今何
由飄然竟赴玉京召九天咳唾隨浮漚倘教闕世似詩
祖黔州垂白仍宜州更摩巨叉抉六幕須彌震塌能無

愁五十年來一俯仰長庚燭海空勞想金華幸有牧羊
兒爲拂星冠理仙斲青蓮遺集流人間除卻陽冰更無
兩封題貽我兼瑤華展向炎天氣蕭爽是夕月明連引
觴夢中恍惚羣真翔目光炯射哆餓虎魏顓言太白眸
子炯然哆如餓
虎或如摩詰鬚髯蒼
山谷自贊謂貌
似右丞而多髯末一少年衣白袷
南朝結束沿江鄉金銀宮闕彈指見似謂今當朝紫皇
手把芙蓉彩雲裏笑余笠釣青茫茫

有竹居存稿卷中終

有竹居存稿卷下

陽湖言啟方侯卿著 鴛湖王 相惜庵輯

答龔書舸

時龔以檄辦海防事宜留蘇局

苦游太學窺

天章從君拱立穹碑旁平蠻布告字如斗氣蓋萬世威
八荒退而發篋攷圖籍西窮濛汜東搏桑寒門冰海古
不貢猶累百譯通舟航爾時祭酒布衣耳相顧不覺神
飛揚謂余嘗恥作文士苦乏猿臂工挽強軍諮記室亦
快意草檄自足驅天狼男兒墮地志弧矢斯言他日毋
相忘二十年間屢分手江東河朔雲微茫不材得飽復

何恤君豈遽戀官庖羊劒歌夜擊唾壺缺鬢毛欲白鬚
眉蒼讀書便過五千卷空談報

國仍無方昨冬稍喜薦書列高衢或者終騰驤功曹主
諾職雖冗所治恰已兼淮黃君於河漕兩留覽天意始
令錐處囊正期聽雨對牀話符到忽聞趨海疆軍門杖
策實奇遇距躍三百爲君狂我聞互市敝中國尺書厲
禁詞煌煌倘非商舶恣乾沒游魂何敢思跳梁以夷攻
夷有成算紅毛烏鬼今相當神龍助陣天姥下何難殲
此崑崙洋

聖清愛及一螻蟻云用上策宜周防扶胥海口開幕府

牙旗前列扶餘王奏功大愷事非久乘時更望排天閭
作爲雅頌定誰讓便追臣籀歌岐陽不記載門寘石鼓
辟雍之制如明堂

西女曲

新唐書東女國傳云西海亦有女國故言東以別之然傳不著西女厓畧也聞暎夷

女主相承庚子秋四明俘夷酋晏士達拉言女
主名域多喇戊戌卽位年甫十九自擇國人雅
那薄爲壻因假
西女之名賦之

估胡來自寒門北滿篋賸錢光翕施幕面新摩牝主容

波心別涌婆皇國

見南史

堀堞雌風晝夜侵結成颶母氣

淫淫女媧不到天全仄烏鬼長流海半陰前因莫向毘

騫叩男戴狗頭都伏寶羯末蘇毗姓偶延

北史女國傳

卑彌

臺與綠相轉

倭國二女主名

九層樓閣俯冰天

北史女王居九層樓

柳葉

何愁射船穿息婦寨須分八百纏頭綵擬索三千

唐書同統

傳郭子儀與纏頭錦三千

天鶯絨褥羚羊乳瓔珞桶裙翹赤羽不數

詞陵悉莫威慣啗林邑頭黎女鹹草初青望彩蟾白蘭

侍史夕披簾

北史白蘭西別有女國

書求沮澤前金聚

北史女王夫曰金聚

封羨湯滂左玉鈐

唐書武后封東女國王湯滂敘臂左玉鈐衛員外將軍

夢游曾

歷中華美貢使飛車途漸改龍伯人歸失祖洲雨師妾

遠迷瀛海燭龍睡處響呼猗金屑瓶開黑青飛牝馬朝

騰阿祿迪彌猴夜祭佛郎機

隋書女國祭用彌猴

施鉛約組裁紈

素

暎夷以鉛畫字紙厚如絹聯以朱組

面首紅彝爭暴露改號安知武壘

文紀年欲接姁娥步

自稱千八百四十二年以今歲壬寅上推當起西漢平帝元始元年

辛酉

奢香砮王久蠱沙譙國無人駐錦車巾幘翻貽尙婢

婢鄯州節度使尙

繡旗憑付後巴巴

唐書德宗以李懷光外孫燕八八爲

後八八通雅曰當讀巴巴多語以老成者終當請罪除

日巴巴聲之轉也今夷酋有名甲巴巴者

隋書女國有小王

射乳呼還千小兒圓

跌豔到三孃子圭黎南走俄羅斯

曠夷始見于海國聞見錄名無圭黎西域

聞見錄云鄂羅斯亦女主相承

齒髮都關冒頓思欲話和親剛一笑邯

鄲少季少人知

維感二十一首

航海梯山貢道便防秋何事遣戈船州分鄒衍談天外

有竹居存稿卷下

槎走張騫繫空前爲聽鼓鼙思將帥已占吳越動星躔
養兵千日應知奮況沐

深仁二百年

莽莽千山照夕烽羽書交織路何從壞陂語雜雙黃鵠
裂月光搖五白龍神藥綵繪仍互市鬼薪髡歛盡軍容
罪言自比狂言激把臂曾無阮嗣宗

萬里滄波浴日迴澳門金碧耀樓臺幾年海舶輸番賧
一夕胡僧話劫灰射影沙蟲旋變化鳴牙妖鳥久徘徊

但留誓語鐫銅柱半壁何愁忽地雷

礮名

城下珠江逼海陬城頭月暈合圍秋翻緣都會招強寇

誰徙行營駐上流
火照蛟宮眠魍魎
風腥虎穴鬪蝥蟬

武溪一曲休垂涕
已駕巾車伴少游

聞余丈冰懷將北旋

金門西去廈門蟠
誰料同安竟不安
萬竈氣蒸天影動

孤城陰落海波寒
風吹鶴唳迷遙島
潮應雞鳴汨暗灘

知有棄師三尺律
彈章此日誦侯官

侯官廖公劾奏逗遛者

百里懸車古甬東
全軍待敵駕幢艖
誰知身作奔亡計

一任兵來守禦空
三戰皆傷悲別將
九原猶視累元戎

普陀山色城頭近
偏放神光照粵東

去秋廣東言大士助陣

徽外游魂自執迷
訛言須弭浙東西
搜牢正擬屯昌國

購士何堪保會稽
憶昔曾麾楊僕部
剋期便縛李全妻

黑洋一戰安南絕洗足船頭卸水犀

李忠毅公曾於定海外之大洋破蔡

匪殲安

南夷

捷奏欣從海外論全閩保障倚東藩
抽丁再扼雞籠塞撥甲三巡鹿耳門
是夕火光驚呂宋前軍水底取孫恩
平時祇識姚南仲鈴閣揮毫對一樽

姚石甫先生臺灣再捷

乍浦黃旗照海波百年勁旅此橫戈
唐家都統行營盛漢代將軍戚里多
牧馬諸屯裝鐵勒呼鷹小隊閃金珂
煙銷塵捲須臾事空怨山頭窳堵坡

朱竹垞曾言乍浦佛塔爲賊標

兩褶帕首語綿蠻云是明州棄甲還
烏幔曾藏陳顯達雷符空畫李光顏
春移骸骨填湖蕩窖括金銀破堇山

千載句章都尉治閑田滿郭夕陽殷

三江東入路堪虞黃浦從稱第一區絕域奇珍中戶滿
銷魂聲伎廣州無將星先墜歌虞殯寶氣窮搜導賈胡
賸有山松殘壘在十年生聚恐難圖

天塹宋方扼半陞重兵列戍易登陴千尋白浪橫江鎖
六月陰風鎮海旗偶見盧循爭鼓譟又隨滬瀆撤藩籬
行人指點圖山口一旛堪當十萬師

隔岸重關竟寂然廣陵城外素旂懸酒如臧質封偏少
市有弦高犒已先其道養鷹須飽飈此間騎鶴賴腰纏
二分明月原無價添卻中秋買放錢

有竹居存稿

卷下

五

鍾阜連峰入杳冥
圭黎貢使記曾經
絕無封豕長蛇力
况有龍盤虎踞形
安石風流宜別墅
伯仁慷慨向新亭
南征諸將知多少
幕府山頭請勒銘

東有吳淞擅水操
狼山陡插地形高
海門魚入如游釜
江介羊亡易補牢
夾岸攻應張兩翼
中流陣可截千艘
忽談兵勢吾誇矣
餌敵今方重犬韜

聲言縱火候風狂
檣斫金隄柳萬行
似此攻心稱上策
待誰答背服中行
沙洲蘆荻連天遠
河朔芻蕘計日昂
時桃宿無限流民知
惜費倮然枵腹過淮陽

飛來謀語莽無端
疾走遼東若轉丸
煽逆縱能牽五鬼

陳倫炯海外圖大分軍那敢越三韓騎衝元菟談何易
西洋烏鬼凡五種
柝接黃腫退亦難守險試參吳客語此身幾處備風寒
往年渤海候妖祲東堵成山計日擒累荷

聖朝寬大詔翻生荒徼覬覦心九河檣起滄洲隘七萃
營連碣石陰少府水衡都似昔肯教卜式再輸金

莫謂臨安富不貴金閭供億早難支隔年盧橘山棚訪

先去聲月甘瓜水遞馳錦帳彈箏催靜婉綃衣蹋鼓對辛

毗汾陽聲伎當前滿恐是功成里第時

家本蘭陵古時前瀕江馳道直如弦杞憂敢托千閭廈
藿食方求二頃田楚水清輕兵最弱道州貧薄賊能憐

吹唇萬輩揚帆過事後驚聞一惘然

宵分起舞聽鷄雞北斗闌干太白低鬱鬱天門屯虎豹
茫茫人海竄鯨鯢金縢犒士兵何敵璫寺擒王史可稽
明永樂中太監鄭和擒錫蘭山王亞烈苦
奈兒又於蘇門答刺擒其王弟蘇幹刺
百丈李忠毅公會造大船曰寔船懸軍奮掃大荒西

聞桃宿間河決有感五首

去歲奔流觸大梁今來淫雨溢徐方可憐客戶俱魚鼈
祗爲移家避虎狼大江南北避兵者被淹甚眾驛路改馳芒碭澤轉

輸誰寘海陵倉徙河成迹垂千古卻笑當年賈讓狂
荆南千里沸如雷聞道江陵更可哀犁石雪消傾蜀棧

洞庭浪濁擁秦灰雲飛赤鳥昭邱隱雷逐黃熊息壤開
歲費隄工三百萬泥沙一擲總難回

海疆尤重海塘工幾度

安臚幸浙東太息烽煙今未靖可能壘石勢仍雄夢中
忽睹

親巡詔徼外兼收保障功萬姓山呼狂虜拜澶淵吾憶
寇萊公

汶衛交流達

帝京千艘聞尚泊臨清太平已著咽喉喻小醜須防蝮

螫情袍鎧輕裝曾掩襲

明史邱福傳李遠事

膠萊間道自縱橫水

工游手多無賴安得圍操十六營

潞水誰當續客談重臣經國定無慚萬年至計蕭規建

五疏區分趙過諳但使墾田通塞北何容飛輓仰江南

郊圻況有賢王跡父老謳思涕尙含

林少穆先生在粵時有萬年至計一

疏引怡賢親王水利事

書元遺山集後

舉足關輕重斯文兩代爭入秦無子順終宋有淵明野
史亭何在中州集並行從教老臣素幾輩學先生

聞荊州江溢寄楊雲萊卽答其見懷之作

去秋書到話江防楚士多應笑客狂何意駕天高浪入

難誇遶郡古隄強石移八陣迷魚復帆落三巴宿馬當
可恨金沙源最遠破山何不走西荒

吳淞東望尚兵戈此夕鄉心定若何我願大江都變酒
徑呼明月共淩波子虛氣可吞雲夢哀郢詞應弔汨羅
更酌耒陽沈醉客由來忠憤足悲歌

得袁滙川馬全五書卻寄

鶴唳風聲定有無孤塵名山絕頂指丹徒火輪煙卷三山

沒水櫃虹隨百怪驅嘉慶中噴夷入貢通事先譯貢物

水櫃音雜鳥都藏辮髮隊分龍伯露鬚謀言有沿海奸民及佛倫

國長就中金珞紅褱滿略似當年職貢圖

有竹居存稿

卷下

八

百瀆無如孟瀆清早從耆老話躬畊樹經宋季諸賢拜

時任蕭家兩代爭

謂唐代銀杏及齊梁郊祀壇

白塔遙通全浙餽黃

山近繞備倭城如何變起滄洲外徹夜江濤送鼓聲

里閭頻憂俠少年得人調護便驪然莫疑謝客成山賊

肯就孫恩學水仙保甲可編須見

夢旬反

戶流民易募乏

閒田君卿脣舌君房手知抵防秋億萬錢

寄甘露寺西林上人

毒霧橫空失素秋修羅兵劫佛先愁誰教蟠踞三山頂
祇恃嵯峨萬斛舟傳檣盡驅蒙古騎投鞭立斷大江流
天威一怒應難測爾日何能遁海陬

倭舶當年向秣陵
椎鋒曾藉少林僧
比聞西旅忠尤著
指班禪助餉事何事南宗謝不能
刀劒腥臊汙梵夾
金銀臺殿咒摩登
請緇舊揭秦王教
此是嵩山第一燈

江上六首

江上諸屯日控弦
問誰鞭弭共周旋
廉頗飯竟三遺矢
夏竦頭堪兩貫錢
七縱七擒形易控
一裘一佩膽難堅
海門東望秋濤急
無復將軍下瀨船

八部攜家自上都
南疆碁布靖萑苻
可堪鐵甕瘡痕甚
轉使金陵指臂孤
倚閣誰呼丁督護
及關難免銳司徒
平湖覆轍曾先見
扼隘何當掣虎符

鉛畫盤挈譯語繁枝官十輩遣和番一鍾夕定黃龍誓

七丈朝攀白虎幡漫把次王稱趙信從知謀主屬張元

經過寶晉齋頭路馬矢沈埋不忍言

夷目甲巴巴
占居書院

秦淮東貫冶城隈番騎雙雙棘院回累日縱觀倉庫盛

平明馳報壁門開會盟豈厭商君詐設伏先愁突厥猜

其笑涇陽荒草地當時便道令公來

謂比平倭什倍難請言明季膽應寒監軍面索千金橐

樞府潛求八寶冠私市中官通李錦飛章大姓詆張紉

只今掣肘都無慮西賊惟愁有一韓

江流潏泱百蠻通徹曙桅燈照眼紅祭罷鰐魚經幾日

饗來海鳥更多風珊瑚樹老爭收網玳瑁花開任轉蓬
力掃荷蘭巢穴淨史家休薄鄭成功

客談靖江之捷誌喜

喚夷抵靖江鄉民堵之江
口三遇皆捷遂揚帆去

一呼斫賊氣排山只在荒江斷岸間
白棹袒胸貪野戰花門斃面乞生還
城藏草樹千屯台石露沙洲八陣環
不費斗糧狂寇卻傲他精卒戍雄關

輿中閱王惜庵初藁卻寄

恍如酌我鴛湖間

君居有
小鴛湖

觀君抵掌時解顏凭輿把卷

樂復樂拋卻十里攀頭山
昨者彭城枉車騎眉間隱約
識奇氣紅衣未獻綳帶先苦抱
沈疴失交臂聞君近卜

司崕居鍵關畢讀天下書此身果得此暇日蟻視塵世
皆唾餘橫流湏洞海波惡豸蟲不蟄化蛟鰐異人甘溷
山澤癯長劒倚天問安託漫將歌哭抒性情誰爲安石
誰蒼生鸞翔鳳翥恣腕力河朔早以能詩鳴使我沈吟
起遙矚譬探海藏珠滿握商歌欲和琅璈音笑折珊瑚
扣龍角自古結交無比鄰知心相隔彌相親附書試質
陸內史謂春僕亦江湖一散人

孝子筆歌贈蕭縣鄭孝子本立

浣以冰天雪海風散之寒泉染以玉山懸圃日炙之祥
煙蒙恬逐兔老幕北對此敢謂能爭妍古來筆陣許橫

埽盡荻勝擁廬門椽何况燦花五色光燭天晴窗盥手
試拂拭恍若孝子蹴躡來吾前我識鄭孝子不難其志
難其年所居乃在彭城臨沛山澤間厥父遠戍踰居延
孝子甫十六隻身走窮邊母云汝父指缺節汝謹默識
無妄言西遶伊吾南抵于闐北搜烏魯木齊界縱橫織
路萬九千崎嶇八載經十死乃遇褐叟揮涕漣爲爾述
父狀引爾標父阡發覩木已朽折指猶宛然得無遇者
爲眞仙不爾何以怪魑妖彪悉辟易神燈導路穿雷淵
徒步負骸得歸里家惟四壁門無關有母莫養心憂煎
讀書畧識字他業誠泚顏敢期熊郭天賜錢聊以筆佔

當畊田我思此筆豈凡筆用之不慎成吾愆可書丁零
帖可錄臣密言可臨石壇分隸序可補笙詩戒篇可
繕魯公請朝上皇表可抹二惇二蔡請廢太后燧心正
筆正如誠懸驚天泣鬼蛟龍蜿蜒太乙六甲降乎斗躔
形形睽睽從德星而下觀否則封諸管城任頭禿春蛇
秋蚓勿效吳兒顛左庋孔子研右列文王絃三薰三沐
更三鑿卽寘高閣何尤焉玄卿之銘一旦倘入夢令我
亦陟大荒西極崦嵫巔但求神藥壽爾母差勝醪金酬
直與爾相周旋

書唐上舍夢蝶勦逆說後

烈風蕩河朔萬木聲蕭蕭攬衣視南斗欲醉無濁醪案
有東海書使我歌且謠生不操尺筆空言斬代庖撫時
致慷慨嘿嘿嗤吾曹夷孽昔蠢動植根非一朝鬻山覲
互市淫藥爲之苗狂徒競法喻遺毒洪流漂銷金歲千
萬腹地愁中枵諫官幸上列厲禁嚴誅梟戕然大府帥
銅柱方南標賜茶易穢土一炬炎荒燒黑煙卷洋面龍
媼噴雲逃僉謂從此絕廣南無叫呶俄聞節使罷坐聽
民哀磬澳門夜篝火嘯聚聯千艘專征出勁旅纛下垂
兩髦到日卽左次行營環惠潮粵民特憤激羣起香山
坳搏戰再大捷夷舟沙際膠乘風蕪編秆半夕覘枯焦

將軍忽下令開網驅鯨鼈擺尾入巨壑吞牯氣益驕遂
窺碣渤戶索食踰百牢嫚詞號恭順和幣私相要退而
擾揚粵壘逼番禺郊七閩亦震動徑犯胥江濤幕府佩
印劔三吳彌繹騷部伎雜鐃吹斜封如蝟毛自吳及杭
越谿谷皆酒肴伯仲迭倡和雙聲應礪礪徒聞日報賊
詎將狂虜挑養癰歲復歲已潰誰能消乍浦更黃浦搜
牢括秋毫將星白晝隕正練衝雲梢提督陳公狂驅抵京口
喋血神鬼號曾未遺一矢山川歸寂寥秣陵古重鎮列
戍驚鳴髀往還定和議深恃惟弦高棘闕禮樂地夷目
來游遨亦復宴夷艇前驅戴旌旄於時值

聖節彼此矜招邀沸天擊鼙鼓鬪富誇酋豪逾月始護
送江波照銀袍市兒慶額手幸免膏夷刀先是六月中
唐子心鬱陶杖策謁軍府火攻奚憚勞虜旣蹈深險焚
林取猿猱葦筏塞諸隘噴箭飛赤燄寸圖繪曲折目驗
殊耳剽片甲使不返千秋堪解嘲大吏各擣舌答書兼
譏襲斧柯彼自擲局外安可操烏虺蠱臣抗論由草
茅流涕長太息聲難聞九霄但縱同甫筆萬言肆滔滔
謂逢不諱世槩板當傳鈔挑燈展紙尾怪奇軼諾皋願
我獨撫掌君詞仍潤淆茲變古未有尋源試爬搔攷昔
倭禍始徽人實潛招蔓延數十載邊郡經蕭條國王憎

未覺貢使猶乘輅日本路非遠虛聲尙難料况茲地球
底隔絕尤迢遙伊叻一女主何敢攖

天朝此必市舶藪奸商夙招搖竊窺都會盛沿海金錢
饒無計免關稅利權思倖徼會當禁私佔醜類悲無聊
因之借名號突起攻舟鯨妄托龍伯種長人閃山魃我
旣杳莫測胡由搗其巢兼能廣遺賂珠貝裝刀鞘鐘表
測遠鏡髌毘密解苞所觸輒奔潰漏師資豎貂淫掠以
億計哆張詞不撓要我城下盟迫我稱平交嗾我僧馴
輩居閒助煎熬假我帑藏物分肥供老饕苟非暗糾結
安得牙行囂君看黑男女充貢同旅獒

見明史
外國傳

豈必英

圭黎始有此殊妖火輪本激水船制沿楊么云何礮尤
烈我詎無礮硝白鬼特估豎遽稱彼大僚蔭階與軍秩
學語眞攢嘈

夷書有稱世襲男爵三等將軍者

欺天漠不顧反謂能柔

調不然蠻觸耳未足當焦僥不見澎湖戰每穀必伏發
靖江祇僻壤赤手偏斬蛟忍擁十萬眾當關莫敢掠飽
颺餓復煽覆轍應週遭君謀定可用終厠龍虎韜無容
賦招隱自放隨漁樵昨來閱邸報驟覺形神超

天子赫斯怒八荒思并包檻車徵二帥天命信不謫百
吏讐

嚴旨勵兵開韃囊警駕隆車馳螳臂庸再翹方將洗兵

馬壯士懷天瓢氣懾鬚髮北好音回鷗鵲念此倏起舞
荒雞感中宵悠悠滄浪亭水石淩寒飄往年值此夕元
戎正翔翺金閭化金窟徹曙聲騰驍名蹟喜無恙鐘魚
隔僧寮安得飲君酒縱談且持螯續成靖逆記凱奏聆
韶簫

有竹居存稿卷下終

嗚呼先生秉鐸吾邑十餘年學海湛深而一官冷落鬱鬱以終可悲已憶慶幼時從陳怡齋師讀書嶧陽怡齋師所著怡齋詩草六卷丐先生勘訂付梓尺函絡繹因得讀先生詩已亥始進謁而客途風雨離聚無常嗣慶羈栖日下卽聞怡齋師捐館比回南而先生抱疴旋里亦歸道山矣嗟乎士君子不獲珥筆承明潤色鴻業則思以歌詠抒其懷抱藉顯於後者今古同情迺怡齋詩草剞劂甫就屢戾陽侯浮沈難問是集得惜庵先生輯付手民道義之篤千里無間豈天之困抑者卒愛護與抑傳之遲速有數存與捧校數過曷勝黯然至詩體奇

有竹居存稿跋

邁粲溢今古識者自辨之無俟贅述云咸豐丁巳七月
下邳門人魏邦慶謹跋

侯卿先生以松郡孝廉秉鐸下邳課士之餘日事吟咏
與先君子初未識面因見無止境詩賦長篇見貽遂訂
交焉厥後禹疇應童子試先君子攜之郡城獲見先生
於旅舍丰采言論如水鏡瑩然輒深嚮往數年之間往
返金陵青溪畫舫昕夕過從迄今思之猶依依在目前
也先生歸道山著作甚夥此編古近體數十首先君子
所手訂亟隨伯兄校刊敬識數語以誌顛末云爾咸豐
丁巳六月世愚姪王禹疇謹跋